



Stejišćo Zwjazkowneho předsydstwa Domowiny – Zwjazka Łužiskich Serbow

Za zawěšćenje serbšćiny na serbskich šulach w Swobodnym staće Sakskej

Zwjazkowe předsydstwo Domowiny starosći so wo wuwće personelneje situacije na serbskich šulach w Swobodnym staće Sakskej. Zachowanie a dalewuwić serbšćiny njeje dowolny statny wukon, ale nadawk, kotrež ma swój zakład w Sakskej wustawje.

Artikl 6 wotrězk 1 sada 2 sakskeje wustawy zaruča a škita prawo serbskeho ludu na hajenje a wuwíwanje jeho zdžědženeje rěče, kultury a tradicijow, wosebje přez šule. Sakski šulski zakon a Sakski serbski zakon zawjazujetej Swobodny stat w serbskim sydlenkim rumje wuměnenja za nawuknjenje serbšćiny a wučby w serbskej rěči kaž tež jeje zachowanie, spěchowanie a dalewuwíwanje trajnje zawěšćić.

Tute zawjazki žadaja sej konkretne organizatoriske a personelne wuměnenja.

Po § 4 wotrězku 4 sada 2 postajenja Sakskeho statneho ministerstwa za kultus wo džěle na serbskich a druhich šulach w němsko-serbskej kónčinje zasadžeja so na serbskich šulach jenož wučerjo, kotřiž za wuwučowanie wotpowědnu serbšćinu wobknježa. Hižo z toho wuchadža, zo njeje nałožowanie serbšćiny jenož na jednotliwe wučbne hodžiny wobmjezowane, ale so tež na wšědny šulski džen počahuje.

Za zwjazkowe předsydstwo rěka to, zo w serbskich šulach před kóždej rjadownju wučer steji, kotryž serbšćinu wobknježi a ju samozrozumliwje w šulskim wšědnym dnju nałožuje. Nimo wuwučowanja w serbšćinje wučer na serbskej šuli ze šulerkami a šulerjami zwonka wučby kaž tež ze staršimi, kolegami a koleginami bjezposrědnje a wěšće serbsce zhromadnje džěla. Runje rjadowniscy wučerjo, a to wosebje na zakladnych šulach, zabjeru wažnu rolu za rěčne wuwće a wutworjenje identity džěci.

Spjelnjenje wosebiteho z wustawy wuchadžaceho nadawka njeje bjez skutkownych organizatoriskich naprawow předstajomne. Tute naprawy wobchować resp. je wutworić, je nadawk a winowatosć Swobodneho stata Sakskeje. Kublanski narok wšitkich džěci dyrbi so dospołnje spjelnić; to pak so njesmě na kóšty zachowania a wuwća serbšćiny přichodneje generacije šulerjow stawać.

Zwjazkowe předsydstwo Domowiny namołwja tuž Sakske statne knježerstwo, personelne wuhotowanie serbskich šulow tak zaručić, zo kóždu rjadownju wučer nawjeduje, kotryž serbšćinu we wučbje a we wšědnym šulskim dnju wěšće nałožować zamóže. Rozsudny, kotrež so tutej zasadže znapřećiwjeja, wohrožuja skutownosć serbskeho kublanskeho nadawka a wuprudžeja wopačny signal staršim, šulerkam a šulerjam kaž tež cyłemu serbskemu ludej.

Přichod serbšćiny rozsudža so wšědny džeń na šulach. Štóž chce serbšćinu zachować a dale wuwivać, dyrbi přirodnu wokolinu za nałožowanje a wužiwanje rěče stworić. Swobodny stat Sakska njese za to wosebitu zamołwitosć, kotraž z wustawy a zakonjow wuchadža. Tutym prawniskim zakładam dyrbi Sakska bjez wobmjezowanjow wotpowědować.